

## “T’ami, No T’e!”

Bill Shoemaker tabata un di e mihónan. Despues di 41 aña komo hinete, el disidí di bandoná korementu di kabai pa bira un entrenadó. Anto el a enkontrá disaster.

Un anochi e Ford Bronco ku e tabata manehá a kita for di kaminda i a kai den un presepsio di 13 meter. E hinete a keda paralisá, un presu di su ròlstul pa e restu di su bida. Fanatikonan a ekspresá nan simpatia pa nan heroe. Doñonan di kabai a ofres’é bon kabai pa inisiá su karera nobo komo entrenadó.

Ma e yobida di simpatia spontaneo a evaporá kasi mes lihé ku el a kuminsá mirando Shoemaker su komportashon despues di e tragedia. El a kobra gobièrnu daño perhuisio pasobra no tabatin fanrel banda di e kamina unda e aksidente a tuma lugá. El a hiba e médikonan dilanti hues, pasobra segun e, su kondishon físiko tabata resultado di deskuido di nan parti. Kompania di Ford mester a pag’é pasobra el a akusá e fabrikantenan di produsí un outo peligroso.

Ma tin un detaye chikitu ku Shoemaker i su abogado a evitá di menshoná. Na momentu di e aksidente, e tabata burachi.

Shoemaker por a bisa su fanatikonan, “Mi a hasi malu. Nunka kore outo bou influensia di alkohòl. Mira kiko a pasámi.” Ma alkontrario, el a akusá otronan sin tuma responsabilidat pa su propio eror.

No ta Shoemaker so ku ta nenga asumí responsabilidat pa su propio pikánan frakasonan. Diariamente por nota e aktitut den nos komunidat ku ta muestra dede riba otronan, kompañá pa e palabranan enfátiko, “NO T’AMI, T’E!” E mama ta afirmá ku e no por a yuda ku el a pèrdè kabes, ta e yu ta traha kun’é. E yu ta ekskusá su desobediensia bisando ku su mayornan ta muchu eksigiente. Alumnonan ta akusá menernan pa nan mal rapòrt. Un pèrsona ta para riba ku el a papia bon, ta su kolega a komprend’é malu. Un malechor ta tira kulpa riba otro pa e krimen. E kliente ku a kumpra un produkto di kalidat inferior ta akusá e komersiante di bende produkto defekto ora e ta dañá.

E tendensia di nenga tuma responsabilidat pa nos propio ofensanan ta nada nobo. Di bèrdat, e ta eksistí fo’i tempu di Adam i Eva. Despues ku nan a kome di e fruta prohibí, Dios a puntra Adam, “Bo a kome di e palu ku Mi a tahábo di kome di dje?” Na lugá di aseptá responsabilidat pa su piká, Adam a respondé, “*E muhé ku Bo a duna...a dunámi for di e palu..*” Ora Dios a konfrontá e muhé, Eva a bisa, “*E kolebra a gañámi..*” (Génesis 3:11-13). Un a tira kulpa riba otro.

Awendia ta méskos...nò, pió! Aparentemente ningun hende ta frakasá mas! Semper AMI tin rason i ABO ta esun ku a ofendé, frakasá, lubidá, i malkomprendé.

Ningun di nos ta gusta atmití ku nos a kiboká. Nos no ke baha kabes pa otro. Nos tin miedu pa nos kara keda sushá dilanti otro hende. Nos ta orguyoso. P’esei nos ta muestra dede riba otronan.

Pa nenga tuma responsabilidat pa bo propio fayonan no ta sania e heridanan di un relashon kibrá. Alkontrario, ora bo ta atmití ku bo a hasi malu, e ora e tin oportunitat pa restorashon. Por ehèmpel, si mi ta gañábo un biaha i bo ta bin haña sa, lo bo keda kòrda esei pa e restu di bo bida maske mi ta papia bèrdat ku bo tur biaha despues. Ma si mi ta atmití ku mi a gañábo i pidíbo pa pordonámi, mi ta rektifiká e pasado i ta restorá bo konfiansa pa ku mi pa futuro.

Mustramentu di dede, ekskusanan, i tiramentu di kulpa no ta solushoná nèt nada. Beibel ta deklará, “*Esun ku skonde su pikánan lo no prosperá, ma esun ku konfesá i laga nan lo haña misericòrdia*” (Provèrbionan 28:13). No ta fásil pa umiyá bo mes dilanti Dios òf un pèrsona i atmití bo kulpabilidad. Pero esei ta esensial pa haña pordon di tantu Dios i hende. I Dios ta primintí, “*Umiyá boso mes anto bou di e man poderoso di Dios, pa E por halsa boso na e tempu apropiá*” (1 Pedro 5:6).

Ta tempu pa bo stòp di bisa, “No t’ami, t’e!” Ta tempu pa bo stòp di muestra dede i tira kulpa riba otronan, ekskusando bo mes. Ta tempu pa bo kuminsá rekonosé bo fayó, atmití bo kulpabilidad, asumí responsabilidat pa bo frakaso. Ta tempu pa bo bisa, “Despensámi, (òf pordonámi); mi a hasi malu.” Ta tempu pa bo bisa, “T’ami, no t’e!”